

Bonkand'ond'aphe bonda 2 Petero

Tshapita 1

1 Simona Petero, bontamba la ekima enda Yeso Kilisito ele baiko baolaya yimedya elekola bolotshi ekiso wambaka ma onanwa ona Ndjambi endiso la Bosukako bondiso, Yeso Kilisito. 2 Diyota la wee baphuli ele inyo nda weyi bona Nkumundjeyi, la bonda Yeso Nkumu endiso.

3 Shene eki mpamba enandi ena Londjambi etokaaki baoi baumela banda lomo la bolakwa ele Nkumundjeyi, andeyisho one ondotetaki nda ditombya la bolotshi onandi; 4 andi otokaaki balaka ban'anene, bale la botshiya bolecola, ina inyo yamba, ma balaka ane, baoi banda lomo lona Nkumundjeyi, la diphurumwa ma bophondju boyadi nd'atei ana motshi ma mpose enda baoi ban'embe. 5 Ko, nda djoji ine menge lokalanganaka ditaanya bekeledi bend'olotshi nda yimedya eninyo; lokokyaka bekeledi bend'olotshi la weyi; 6 lokokyaka weyi la diyakata; lokokyaka diyakata la mpitshi; lokokyaka mpitshi la dimemya dina Ndjambi; 7 lokokyaka dimemya dina Ndjambi la dilangana la baina baninyo; lokokyaka dilangana la baina baninyo la lolango menge. 8 Nkina baoi ane bayadi nda betema beninyo, la baophula nkoko, lokoyala banto bapha la mponye nkina banto baphotshwi mammo nda weyi bona Nkumu endiso, Yeso Kilisito. 9 Bonto bondelengana la baoi ane ayadi iyoo, ayadi yenaka nko baoi batshutsha antulu, aolophela ayandi, Ndolokyama ma bembe benami beki oso. 10 Sheko, baina bandiso, lokalanganaka dikokomela nda yeta eninyo o la nda esonamelo eninyo; nkina lokokela baoi ane, inyo lophongokunumola botshwako; 11 ko shiko inyo lokambalomi wotshwelo bonda phululu nda waphemelo bona Nkumu endiso, Bosukako bondiso, Yeso Kilisito.

12 Nda ditshina ine ndokokalanganana dilophola baoi ane betsho beuma, nkula inyo yeyak'ako la lombokokomela nda baoi banda soosolo banda ekeki ene. 13 Ko, al'emi nda djongi dine, ntangane mbo, Diyadi la emi diletola la dilophol'ako, 14 la boloko ona emi yeyaka mbo, Wina bona emi disekwa ma lodu lone lona impema botutama, shene eki Nkumu endiso, Yeso Kilisito ansangelaka. 15 Sheko, ndokalanganana nda baoi ane ina inyo dikusa yaophwa betsho beumela awakalom'emi. 16 Djoji inda totoyela nshawu iki banto akanedyaka nda wanya bondiyo menge, akiso alosiselaka mpamba ena Nkumu endiso Yeso Kilisito la eutelo enandi, aye tolona ditombya dinandi la baisho bandiso. 17 La boloko ona andi aolamba bosako la dimemya m'ele Ndjambi Apha aki lolaka londa shiko ayakaka el'andi ma etetenyi enda dimemya dilekola mbo, One ole Bona bonami

bolang'emi, nadi aonshashadya soosolo. 18 Ishi menge toloka lolaka losoko loyaki ma loola akiso la andi nda bokoto bonda ekila. 19 Ko djoji diki basangi atosiselaka iyolekola yekema el'isho; sheko bolotshi boninyo diphonga yookodya, (shenda itshwa iyopheta nda djowa inda widima elengi ndi ekyelo enda wina), la iyotshi ina inkenkesha iyolenya nda betema beninyo. 20 Leyaka djoji dine nd'oso mbo, Eneyelo eumela enda akotelo epheyani ma ephenengola end'eko menge, 21 la boloko onda esangelo enda basangi etotephelama ma lolango londa banto, aye basangi banda ekila bana Ndjambi atephelaki na mpamba ena Nyuma end'Olotshi.

Tshapita 2

1 Aye shene eki basangi banda bephoto ayaki nd'atei an'anto, nko shiko baekyi banda bephoto baikotshwa nd'atei aninyo, baikokokola baoi banda dikodi banda ephitanelo, baikangana Nkolo endasombaki, ko baikoyaphita phwaphwa. 2 Eusa en'anto baikoyela bekeledi bendiyo benda ephondju; la boloko ondiyo mboka enda soosolo ekosediyama. 3 La bonkita bondiyo, o la baoi bandiyo bana ngombo, baikolokapha shenda djomba nda djoka inda yaya bosolo; elombolelo endiyo eshila disangediyama elengi la ephoteme dikelama, la ephitanelo endiyo ephetami ilo. 4 Nkina Nkumundjeyi atosuka bandjelo akiyo akelaka bombe, aye andi ondaushaki nda elenga elekola enda tshuu, aolalemba na enkandju enda widima elengi ndi etenelo enda beloko; 5 ko andi atikya banto baki ososo, aye andi osukaki Noa, bomodi bona nsambo, ondaki bonda baoi bana onanwa, akiandi atshumyaka motshi inda bantonyi bana Ndjambi mpela; 6 la akiandi aphaningolaka bela benda Sodomola la Ngomola betoko, andi ondaphelaki la ephitanelo, inda eko diyala ilimbitelo ele baiko baumela baphongomemyalomi Nkumundjeyi; 7 aye andi ondikiyaki Lota, bonto bonto bond'olotshi; boiko odyalengaki la baoi bana bantonyi bana Ndjambi; 8(ondi onenaki la andi ondokaki baoi baiko akiandi wulamaka nd'atei andiyo, la botema bonandi bonda olotshi bonyonyaki la wina la wina la bekeledi bendiyo ben'embe); 9 Nkolo yeyaka ditshongola bamemyi banandi ma elu, la yumba bakedi ban'embe elengi ndi wina bonda elombolelo, inda iyo yena elu; 10 dilekola baiko bayadi dikendaka na mposa enda baoi banda djongi, nda dilula ina mindu, bayadi ditolaka mpipho. Bale la betema benda baongo la betsha bend'oolo, bapha la bophodu bonda ditola yaphemedi; 11 nkula bandjelo bandalekola la bokemba la mpamba baphaphindula nd'oso ona Nkolo. 12 Ko baiko bale shena nyama ipha la mpima, itongamaki inda banto yakanda la yadjaka; iyo ditolaka bankina nda baoi baphiyo weyi, la iyo baikophitana nda bophondju bondiyo, 13 baikambalomi lophutu londa wesanyi bondiyo;

basoko bayadi disalanganaka dikela baoi bandiyo ban'embe nda iyani; bale nga yulo la manga, la iyo baleki la inyo elala nda balambo baninyo; 14 baisho bandiyo baolola la bokelo, baphokusi yambya baoi ban'embe; iyo yongyaka asi iyodu; betema bendiyo baolekela yoka djomba lonkita; bale basi wambo; 15 baoletela ma mboka ena nwaa, baolungusana, baoyela mboka enda Balama, bona oki Bosolo, ondasaki lophutu londa baoi baph'olotshi; 16 ko andi aophelama la boloko ona onkala onandi munge, mpunda enda lokishi otephelaki la lolaka londa bonto osukaki iyetetshi inda bosangi. 17 Baiko bayadi ituku ipha la bashi, bakongo baotombama la ephелеle; widima bonda tshuu bolambedyama botshwako. 18 Djoji inda iyo bayadi ditephelaka baoi bana anene bana mpampa, ko ma mposa enda baoi banda djongi la dilula, iyo yongyaka bamodi baongasa ditshungwa ma baiko basembi na mboka enda wungusano; 19 bayadi yalakaka mbo, Lokotshungwa, ko iyo munge bale bantamba banda baoi banda bephondju; djoji inda nkina bonto aotekyama ele emba emodi, andi ayadi bokwala bondeko. 20 Nkula iyo baotshungwa ma baoi banda bephondju bana motshi ma weyi bona Nkumu la Bosukako Yeso Kilisito, ko baoluta dikophama la bako la ditshungama nkoko, esuka endiyo ekolekola angolelo endiyo bombe. 21 Akiyo weyaka mboka end'olotshi ko m'okongo baolungusana ma engembe enda ekila ekiyo wambaka, elekola bolotshi tshika bateyi mboka eiko. 22 Shene djoji ina nshawu dikelama ele iyo mbo; Mbvwa eluta dila emba eki eko adweki, la nsumbu ekiyo asolaka eluta yungutshwa nda lontuku.

Tshapita 3

1 Balangami banami, nsholokotela bonkanda one onda aphe; nda eko ek'ephe nshongodya betema beninyo benda phetoo inda diliphola mbo; 2 lophwaka baoi baki basangi babda ekila asangaka nd'oso, o la dingembe ina Nkumu la Bosukako diki dikima ininyo alosiselaka; 3 leyaka djoji ine nd'oso mbo; Nd'etsho enda esuka yembodi baokoyaka la wembola bondiyo, baokokenda shene elangiyo na mposa indiyoy, basanga mbo, 4 Dilaka dina eyelo enandi ileko? Djoji inda ma betsho beki baapha awaki, baoi baumela baotshikala o phyophyo ma angolelo enda etongelo. 5 Ko ma baongo banda betema bendiyo, djoji dine imbishama m'ele iyo mbo, Ndjola ikiako elengelengi o la motshi nd'adiko anda bashi o la nd'atei anda bashi, la djoji ina Ndjambi; 6 ma bashi asoko, motshi iko iyophitana aki bashi atshumaka mpele. 7 Ko ndjola la motshi inda etembene, imumbama la djoji inandi inda ditshumbama la tsha nda wina onda elombolelo la ephitanelo enda banto baphambodyi Ndjambi. 8 Balangami banami, Lotophelaki djoji dine iphoko mbo, Wina bophoko oyadi nga ikeki yoni enkama ele Nkolo,

la ikeki yoni enkama ile nga wina bophoko. 9 Nkolo aphokokodyi dilaka dinandi, shene ekanedya banto amodi mbo, Andi aokokola, ko andi aokokomela la inyo, apholangi bomodi diphitana, aye andi alanga banto bauma dikalanganya betema. 10 Ko wina bona Nkolo bokoyaka shenda wiyi; nda wina boiko ndjola iokotshwa la lophoso lona onene, la djomba iyokosendjwa la teya, ko motshi o la djomba ile nkoko baokotshumbama. 11 La boloko bonda djomba ine iuma diyokoledwa shiko, diyadi la inyo yulama la baoi bankono banda ekila la dimemya dina Ndjambi, 12 nda dikutela la disuula eyelo enda wina bona Nkumundjeyi; nda wina boiko loola lokopheta la tsha, la loko lokoledwa; ko djomba diuma dile nkoko diokosendjwa la ingunga inda teya. 13 Aye ma dilaka dinandi tolindedya loola lond'oto la motshi ind'oto; baoi banda olotshi baokulama mpiko. 14 Shene, balangami, adilinyo baoi ane, lokalanganaka diyala la bekeledi benda wee, apha la wulo, apha la mbalaka; 15 leledyaka ditshidingano dina Nkumu endiso nga yika; shene eki Paulo, wina bondiso bolang'isho, alokotelaka na mpima ekiandi wambaka; 16 andi aolosangela baoi ane o la na benkanda benandi beumela; baoi amodi bale nkoko bayadi boolo dikophola; basi longomo la baiko basamba weyi baphoteme yakakatanya o la akotelo ankina phyophyo, inda yaphita. 17 Ko, balangami banami, la boloko ona inyo lombeya baoi ane nd'oso, lephwaka, lophoyungusana la yonga enda banto ban'embe, lophoyokwa ma bokemba boninyo; 18 aye lulaka nda diyota o la nda weyi ona Nkumu endiso la Bosukako bondiso, Yeso Kilisito. Dimemya diyali ele inyo etambene o la elengi ndi wina bonda diiyo. Apha o sesoko!